



20.10.2022

UKA2022/72

Paneeraq Olsen, Naleraq

Isumaginninnermut pisortaqarfik angerlarsimaffinni meerartaqarfiusuniit eqqissiviilli-ortoqarsimatillugu ilisimatinneqarnerini aaqqiagiinngittoqartillugu akunnermiliuttuusarneq pillugu neqeroorummik pilersitsisoqarnissaa anguniarlugu Naalakkersuisut peqquneqarnissaat pillugu Inatsisartut aalajangiiffigisassaattut siunnersuut.

(Inatsisartunut Ilaasortaq Anna Wangenheim, Demokraatit)

Siullermeerneqarnera:

Naleqqaminngaannit siunnersuuteqartumut Inatsisartunut Ilaasortamut Anna Wangenheim, Demokraatit, qujarusuppugut siunnersuut pingaaruteqartoq meerartatta toqqissisimanerusumik angerlarsimaffiminni inuunissaannik siunertaqartoq.

Angajoqqaat tapersersortariallit tamaviaarluta pisariaqartitaasigut ikorfartortariaqarpagut, meeqqamik peroriartortut toqqissisimasumik angerlarsimaffeqartinnissaanut. Tamaana tamatta nunaqqataasugut akisussaaffigeqataavarput pingaartumillu uagut qinikkatut pitsaasumik sinaakkusiinissatsinnut pisussaaffeqarluta.

Siunnersuut Naleqqaminngaanniit imatut oqaaseqarfigissavarput.

Politiit nalunaarutaani 2021-imeersoq malillugu imigassaq tunngavigalugu ajornarsiutit pilersarneri peqqutaallutik angerlarsimaffinni eqqissiviilliornerit aammalu persuttaanerit ajoraluartumik ukiuni kingullerni qaffakkiartuinnavissimapput. Imigassamik ajornartorsiuteqarnerput nassuerutigalugu qanoq iliuuseqarfigisariaqarparput; sunaana peqqutaasoq uagut inuianniguit taama ikitsigaluta imigassamut aammalumi ikiaroorartumut nakkaannikuutigisugut allaat angerlarsimaffitsinni merannguagut toqqissillutik angerlasimasussaagaluit ersiortillugillu annilaangatittarigut ilaatigullu angerlarsimaffiminniit qimaasariaqalertarlutik.



Naleraq

Sisimiuni politiinik suliniut ”samtale i stedet for husspektakler” tassa toqqaannarlugu nammineq nutserlugu ”oqaloqatigiinneq angerlarsimaffimmi eqqissiviillortitsineq pinnagu” aallartisarneqarpoq 2009 missaani tamatumani siunertaalluni angerlarsimaffinni eqqissiviillortoqarsimatillugu aqaguani ullaakkut angerlarsimaffik pulaarneqartarluni tamatumanilu aappariit eqqissilluni oqaloqatigineqartarlutik. Tamanna periuseq Kalaallit Nunaanni politi qarfinnut allanut 2012-imi siaruar-nikuuvoq Nuummi politiit suleqatiginerisigut suliniut ilusilersorneqarmat.

Sisimiuni ingerlanneqalermat angerlarsimaffinnut eqqissiviilliorfiusunukartarneq malunnavissumik appariaateqarsimavoq. Kingusinnerusukkut inunnik isumaginnittoqarfik ilaatinneqartarlarsimavoq, taamaalilluni aamma inunnik sullissisut siusinaartumik ilaqutariinnik qanoq iliuseqarsinnaanngor-simapput. Suleqatigiinnerlu politiit kommunillu akornanni pitsaasumik paaseqatigiiffiusumillu in-gerlanneqarsimavoq. Ullumikkulli suliniut tamanna uninngatinneqarallarsimavoq.

Suliniutit taamaattut pisortataqarfiillu akornanni suleqatigiinnermut pitsaanngorsaataaqataammata iluatinnaqimmatalu misilittakkalli peqatigalugit nutarterneqarnissaa uunga siunnersuummut ilann-gullugu sulissutigineqassasoq Naleqqamiit kissaatigaarput.

Kingusinaannginnerunerpa Naalakkersuisup oqaaseqatimini eqqaasaa tassa 2023-mi ukiakkut aatsaat qanigisariinni nakuusernerup akiorneqarnissaanik siunertalimmik iliuusissanut pilersaarum-mik tunniussinissaat. Kissatigineqarneruvoq upernaakkut ataatsimiinnissamat tunniunneqassappat.

Naalakkersuisut allannguutissatut nalunaarusiornissamik siunnersuutaat taperserparput.

Taamatut oqaaseqarluta Naleqqaminngaaniit ataatsimiititaliamut ingerlanissaa kissaatigaarput.